

**Angallatit nuannaariutit pillugit aammalu angallatinut nuannaariutitut tamanut isumannaallisaanermut ajunaalernermullu atortoqarnissamut piumasaqaateqalernissaq pillugu imaani isumannaallisaaneq pillugu apeqquteqaat aallaavigalugu oqallinnissamut siunnersuut**

(Inatsisartuni ilaasortaq Aleqa Hammond, Nunatta Qitornai)

**Akissuteqaat**

(Ineqarnermut Attaveqaqatigiinnermullu Naalakkersuisoq)

Naalakkersuisut sinnerlugit angallatinut nuannaariutitut imaani isumannaallisaanermut tunngatillugu apeqquteqaat aallaavigalugu oqallinnissamut siunnersuut aallarniutigalugu qujassutigerusuppara.

Imaani angallanneq inuiaqatigiit kalaallit katersuuffigaat. Taamaattumik Kalaallit Nunaata imartaani angallannerit tamarmik isumannaatsuunissaasa salliutinneqarnissaa soorunami pingaaruteqartorujussuuvog.

Naalakkersuisut danskit oqartussaasui suleqatigalugit imaani isumannaallisaanermi pitsanngorsaanissaq sulissutiguarpaat. Kingullermik immap assinginik amerlanerusunik tunisassiornissaq aammalu imarsiornermi ajunaalernermut radiut siumut qulakkiigaanerulernissaat pillugu isumaqatigiissuteqartoqarpoq. Taakku saniatigut nuna tamakkerlugu sikut pillugit sullissinerup siaruartinneqarnissaa pillugu DMI oqaloqatigineqarpoq. Aamma imaani isumannaallisaaneq pillugu ataatsimoorluni qaammarsaasinnaanermut periarfissat oqallisigineqarput.

Kalaallit Nunaanni Danmarkimiluunniit angallatit nuannaariutit isumannaallisaanermi atortulersugaanerannut annertuunik piumasaqaateqartoqartangilaq. Nunani marluusuni angallatit nuannaariutit annanniutillu aqaanngitsut angallammiittussat amerlassusissaat pillugit taamaallaat piumasaqaateqartoqarpoq. Kisiannili angallatit gassitortunik petroliutortunilluunniit atortulersugaappata piumasaqaateqartoqarpoq. Angallatit nuannaariutit 15 meterit inorlugit angissusillit misissorneqarneq ajorput. Angallatinut inuussutissarsiutigalugu atorneqartunut piumasaqaatit annertunerusut arlaliupput, Imarsiornermut Aqutsisoqarfimmit nakkutigineqartut.

Apeqquteqaat aallaavigalugu oqallinnissami matumani angallatitsinni nuannaariutitini isumannaallisaanermut atortunut piumasaqaatit sukannerulersinneqarusunnersut, aammalu suliniutaasinnaasunik nutaanik atuutsitsilersinnaaneq pillugu oqallinnissamut periarfissinneqarpugut.

Assersuutigalugu annanniutinik mikisunik pullanneqarsinnaasunik aamma atisanut annanniutinik piumasaqaateqassaagut? Umiatsiat aserfallatsaaliugaanngitsut imaani angallataanissaat qanoq iliorluni pinngitsoortinneqarsinnaava?

Piumasaqaatit taakku qanoq iliorluni nuna tamakkerlugu atuutsinneqalernissaat, minnerunngitsumik piumasaqaatit malinneqarnerinik qanoq iliorluni nakkutilliisoqarnissaa qanoq eqqarsaatigineqarpa? Taakku saniatigut aamma ilinniartitsinermit atortut suliarineqarnissaat, ilinniartitsisut misilitsittarnerillu eqqarsaatigisussaavagut.

Naalackersuisut sinnerlugit oqallilluarnissassinnik kissaappassi, aammalu partiit isumaasa tusarnissaannut qilanaarpugut.